



COVID-19 Nagaland: Nisung 7 dak tashidak putet

Kohima, Tsüklai/February 11 (TYO): Nisung 7 dak COVID-19 tashidak keta aliba putetba sülen Nagaland nung COVID-19 tashidak menar 12,175 jungogo. Kasa mapang nung nisung pongu anepogo aser tang nisung 89 temang anepaludar, ta health ketdangsür kati ashi.

"Tanü nisung 7 dak #COVID-19 tashidak putetogo. Kohima- 6, Dimapur- 1. Ano Dimapur nung nisung 5 anepogo," ta Director of Health and Family Welfare, Dr Denis Hangsing-i ashi.

Caseload nung shirang aneper alir 11,848 densema lir, ta pai ashi.

Tanü tashi nung iba tashidak agi state nung nisung 88 süogo aser shiranger 150 tanga state-i belenerogo. Nagaland nung COVID-19 recovery rate 97.31 per cent nung lir, ta paisa shisem.

District sasep nung tashidak menartem Dimapur nung 6,476, Kohima 3,859, Mon 605, Peren 507, Tuensang 248, Mokochung 192, Zunheboto 142, Phek 47, Kiphire 41, Wokha 39 aser Longleng nung 19 lir.

Tashidak menartem rongnung nisung 5,057 Traced Contacts, nisung 4,674 armed forces personnel, nisung 1,871 tanga state nungi arurtem aser yakbang nung inyaker 573 densema lir, ta Dr Denis-i metetdaksü.

Tang tashidak agi tonger temang anepalua alirtem Kohima nung 73, Dimapur nung 14 aser Peren nung 2 lir.

Shirangertem rongnung nisung ka dak dang tashidak keta aliba temaitsü tera sayur aser tanungba 88 dak tashidak keta aliba temaitsü kecha mesayur.

Shirang anepertem rongnung Dimapur nungi 6,328, Kohima 3,722, Mon 594, Peren 504, Tuensang 246, Mokochung 183, Zunheboto 139, Phek 47, Kiphire 40, Wokha 35 aser Longleng nungi 10 lir.

Nagaland nung tang tashi nung COVID-19 samples 1,27,552 tendangogo, kong RT-PCR nung tendangba 74,270, TrueNat nung 37,217 aser Rapid Antigen Test ajanga tendangba 16,065 densema lir, ta Dr Hangsing-i metetdaksü.

Nisung pezüi iba linük anir: Rahul Gandhi

New Delhi, Tsüklai/February 11 (Agencies): Ato Kilonser Narendra Modi-i linük ya "hum do hamare do" (asenok ana, ozü ana) policy nung anir, ta Congress lenir Rahul Gandhi-i Brehostibarnü parliament nung ashi.

Ato Kilonser Modi aija jembiba mapang pai ashiba agi, iba tasa ya demonetiation, Goods and Services tax, lockdown aser tang tesüsa September ita farm law asem nung amshir, koba agi linük tesem ajungalen aluyimer mepelar.

"Family planning atema jembiba nenok ajak molung nung alitsü akok - 'Hum do, humare do'. Iba sorkari iba yimyim nem tetetzü tasen ka agütsü. Linük ya nisung pezüi yimsü asür. 'Hum do, aur humaare do'," ta Gandhi-i ashi.

Saka Ghandi-i tenüng kata mashi aser ajaki parnokji meteta lir, ta ashi.

Pai ashiba agi, aluyimer temi longkak aitba ya asenoki anguba kisüng ya masü. Ibai nisung aika takum alitsü atema nokdakba lir.

"Nenok ajaki ibai aluyimertem longkak aitba ama bilemer, saka nenok ajak kanga tai lir. Ibai India nung longkak aitba lir...aluyimer yagi len aniba dang lir," ta pai ashi.

Kechiaser iba farm laws yagi aluyimer kisüng timtemtsü masü saka middlemen renemtsütsü aser dokan tila lapoka alir, tilateri shishilempartem dak kanga mejungi kongshitsü, ta pai ashi.

Tila aser teyari kaka dang aliba enterprises atema ibai takoksa tulu asütsü, koba agi India indang rural economy samatsütsü, ta Gandhi-isa ashi.

"India nung terenlok malitsü, mapa madoktsü...aser ajakji 'Hum do, aur humaare do' ajangzüktsü atema asen linük indang tongtoret samatsüba ajanga lir," ta Congress leniri ashi.

Kohima Police-i ken o jangjashitsür

Dimapur, Tsüklai/February 11 (TYO): Osang kakat nung Govt. agencies temi check gate tem nung sarusaji tenzüko, ta adoktsüba kong February 9, 2021 nü Peducha nung sung abenba gari ka sota sen meshi ta aitsü, iba ken o ya Kohima Police süoki ia agir.

Iba dak sendakba nung Kohima Police-i, Khuzama (Manipur - Nagaland artsü) nung dang inter-state check gate ka achayanger ta metetdaksüner. Iba dak alia Kohima district telongtet

nung senzusenpongertem nem tekümzüka agütsütsü atema National/state highway nung Police personnel tem densema highway patrol garitem yoker.

Iba taitsüba dak ajemdaker Kohima District Police-i ken o bushitsüngdangtsü tetuyuba agütsüogo aser kari danga aibelena aliba ngutetra aibelena alirtem nem tapet temerenshi agütsütsü, ta Sr. Superintendent of Police Kohima, Nagaland sangdong ka ajanga metetdaksü.

Angh Ravi-i contractor tem dang mepelaba lemsatep



Nagaland Angh RN Ravi-i Dimapur aser Kohima na tsüngda gari senzusenpongtsü atema tenokdangba agütsür aliba asadangba senden amenba noksa nung angur. Kohima, Feb. 11, 2021)

Dimapur, Tsüklai/February 11 (TYO): Nagaland Angh RN Ravi-i, Dimapur aser Kohima na tsüngda gari senzusenpongtsü atema tenokdangba agütsür aliba asadang.

Anghi, highway nung gari senzusenpongtsü atema tenokdangba agütsür aliba ajanga nüburtem tebang agi meshitba timtem ajuruba kanga süokia bilemba lemsatep. Paisa, tasadangba kecha makai temen nung long poksatsüba atema Contractor tem dang mepelaba lemsatep, koba ajanga tenem nungi aiben long anenzüka alur.

Paisa, state sorkar dang iba maparen dak sendakba nung aibelena aliba contractor tem

anema ozüng kübok ken o benoktsü asoshi lenmang asadangtsü ajungshi.

Lenmang nung senzusenpongertem kümzüka toktsütsü nüngdakba temulung dang yur mapang talangka agia iba ken o asatepogo aser gari senzusenpong nokdanga ayutsü kecha nüngdak madoker ta angateta Highway lapoktsütsü telemtetba agi. February 12 nü nungi tenzüka anepdang 6 ako nungi 10 ako aser nikongtsütsü 2 ako nungi 5 ako tsüngda gari senzusenpongtsü melatsü. Kasa mapang nung lenmang nung hadirtem teperi ayutsü aser long anenzüka aluba nokdangtsü atema jenjang tapet agütsü, long

anenzüka alur alibatem mapang shidak nung meretktsü atema NHIDCL-i contractor tem nem tetuyuba agüja anepalutsü. Dimapur District Administration-i hopta ka lir maparen asadangtsü aser iba sülen gari senzusenpong tesademba küma lapoktsütsü.

February 11 nü agiba senden nung ADGP & Special Secretary (Home), S.R. Saravanan; DC Dimapur, Rajesh S; Commissioner of Police Dimapur, Rothihu; Executive Director (P),NHIDCL, Kohima, M.S. Deol; Engineer-in Chief, NPWD, Kohima, Er. Limatongdang Jamir aser Chief Engineer (NH) NPWD, Er. KezhaTheünuo nung dena liasü.

Nagaland State Task Force-i Covid vaccination maparen asadang



State nung COVID-19 mozü agütsüba maparen asadangtsü atema Directorate of Health and Family Welfare, Kohima nung February 11, 2021 nü Nagaland State Task Force senden amandang Principal Secretary, Department of Health and Family Welfare, Amardeep Singh Bhatia IAS ajanga o jembiba mapang tangokba noksa nung angur.

Kohima, February 11 (TYO): Nagaland nung coronavirus vaccine mezüngbuba aser tanabuba shilem agütsüba asadangtsü atema Brihostibarnü Directorate of Health & Family Welfare, Kohima nung Nagaland State Task Force senden menogo;

Principal Secretary, Department of Health & Family Welfare, Amardeep Singh Bhatia, IAS menden ser iba senden amen, ta ketdangsertemi metetdaksü.

Senden nung State Immunization Officer UIP, Dr.Ritu Thurr-i Covid 19 Vaccination Drive mezüngbuba aser tanabuba shilem

agiba indang osang tejangja metetdaksü; tanabuba shilem ya anogo 9 nung tembangtsü.

State nung vaccine agir shilem kanga ajemba dak sendakba nung o lemtepa liasü. Mezüngbuba shilem nung, register süa aliba health care workers 21,549 nungi shilem 31-i dang iba vaccine agir aser tanabuba shilem nung register süa aliba frontline workers 51,718 nungi shilem 5-i dang iba vaccine agiogo.

Vaccine agir shilem kanga ajembaji health care workers aser frontline workers-i iba vaccine agiba sülen temang nung timtem

adok nungbo, ta arendakba agi asütsüa akok. Iba vaccine ya peisasa melungtet nung ang agütsü akok, ibayongji health department-i nüburtem nem Covid 19 vaccine nung timtem maliba indang angatetdaksütsü atema meranga inyakdar.


Tang tashi nung state nung nisung 8,948 nem iba vaccine agütsüogo, ajisüaka temang tera metaba mesüra ajem atuba tesem nung tera ashiba dak alaka shinga dak-a temang nung timtem madok.

Senden nung State Task Force-i tanungba anogo 9 nungbo vaccine agir shilem timba akümtsü atema tebilemba lemsatepa liasü.

Nagaland sorkar kübok Department aika- Social Welfare Department, Rural Development aser Directorate of Information & Public Relations-i Health & Family Welfare Department dang nüburtem nem iba vaccine indang awareness agütsüba nung yaritsü, iba denji külemi nüngdak balala nunga yariteptsü, ta metetdaksü.

Senden nungsa district immunization officer temi peipei district nung vaccine agütsüba mapang ajangshiba timtem balala lemsatepa liasü aser State Task Force-i longiemer item tebilemstü onük atema tekaraba nung inyakttsü bangjem.

Mokokchung DPDB Virtual senden amen



Dimapur, Tsüklai/February 11 (TYO): Mokokchung District Planning Development Board (DPDB) senden February 10 nü Speaker, NLA & Chairman DPDB, Mokokchung District Shariangain Longkumer lenisüba kübok video conference ajanga agiogo.

Senden nung Minister, PWD (Housing & Mechanical), Tongpang Ozukum, Advisor Industries & Commerce, NIDC, Imnatiba, MLA, Imkong L Imchen, ADC Mokokchung, S.P Mokokchung, Administrative Officers aser District tekolaktem aser lokti tentet balala nungi lenirtem dena liasü.

Senden nung züngsemtemi Village Council Act, Nagaland Ao oshi agi meyipzüksü atema committee ka tentettsü telemtetba agi. Iba act Ao oshi nung meyipzüksü ajanga tali tajungba angajemtsü.

Kasa mapang nung district nung benoka inyaka aliba central aser state project tem ajak indang osang agütsütsü nüngdakba lemsatepba den project balala benoka inyaka aliba department tem dang taruba DPDB senden nung

inyakyim jenjang metetdaksütsü mepshia asüngdang.

Maneni züngsemtemi Mokokchung nung tajemtsü tzü supply asüba ajungkettsü atema sensak asem aser iba dak sendakba nung Er. Yanger, PHED, Mokokchung-i temaba jenjang nung aliba ketdangsertemi agizüker aliba inyakyim ka benok. Onük tangatem rongnung Mokokchung district kübok dairying terenlok ososhi inyaksü jembi, koba Mokokchung district Dairy Farmers-i temi benok. Maneni iba dak sendakba nung chairman/vice chairman DPDB tekolak ser committee ka tentettsü lemtet, aser iba committee nung district Veterinary Office nungi Dr. Simon züngsem ama adentsü.

Senden nungsa Mokokchung nung P. Shilu Ao Park yanglua aliba lepareprangshi aser Urban Development Officer dang senotsü intokba aser nüngdakba indang osang tejangja agütsütsü tuyu.

ADC Tuli, Imsongmeren-i, Kendriya Vidyalaya, Tuli jenjang kanga mejungi aliba

lemsatep aser iba dak sendakba nung jenjang tapet agitsü atema pa dang school jenjang indang osang tejangja DPDB mendenbuba nem agütsütsü metetdaksü. Ano Ungma yimtsü nung alishilu ayimtsü atema benokba house-i agizük aser jenjang tapet agitsü asoshi iba dak sendakba aliba department dangi abentsü lemtet. Maneni Oriental School nüngja Bridges Academy, Changtongya ta melenshitsü agizüka ayu.

Z ü n g s e m t e m i s a Mokokchung Sumi Community aser Asem Tsuru Rogo Society, Lirmen village, ta loktitentet ana züngoksemtsü agizük.

DPDB-isa, Mokokchung jila nung gari senzusenpong mesadamba indang tebilemtsü benoka sensakasem aser gari nongtepba tebilemtsü bentettsü atema Urban Development Office dang lenmang tajung ka bushitsü nongloksü. DPDB mendenbubai MMC Mokokchung kübok committee ka tenteta lenmang atsülangshitsü asoshi asadangtsü aser ano S.P Mokokchung kübok gari anentsü atema lenmang kar asateptsü asoshi committee ka tentettsü benokdanga liasü.

Tesem balala nung gari ana mi agi rongdok



Firing Range (Army Camp), Dimapur aser 10th Mile, Tuli nung Fire Personnel temi mi remsepsba mapang tangokba noksatem yangi angur.

Dimapur, Tsüklai/February 11 (TYO): Firing Range (Army Camp), Diphu Road, Dimapur nung kitsük-kirong lendong lir ta February 10, 2021 anepdang 7:43 ako nung

osang aruba sülen Fire Station Dimapur (West) nungi Fire & Emergency Services team iba lendong atalokba tesemi ao.

Fire Tenders ana den hadir tabensa benor Fire Personnel

tem iba tesemi aodang truck ka nung ki oset bener lia rongdoka liasü. Mi azüoktsü atema fire team-i minute 55 agia liasü.

Iba kitsük-kirong lendong nung sen lakh pongu jenjang oset sama aser sen lakh 15 shi jenjang osettsüset kumzüka liasü. Gari yagi live wire nung kongshiba ajanga mi ya adok, aser iba lendong nung asü-ama kecha meliasü. Fire & Emergency Services team ya Duty Commander ASI K. Hito Zhimo-i anir oa liasü.

Ano maneni February 11, 2021 nikongdang 2:35 ako nung 10th Mile, Tuli nung kitsük-kirong lendong adoka lir ta osang angazükba sülen Fire Station Tuli nungi Fire & Emergency Services team ka mi remseptsü oa liasü.

Iba lendong nung Maruti 800 AC ka mitsü kuma rongdok aser sen 25,000 jenjang oset rongdoka liasü. Gari nung wiring meshidakba nungi iba mi lendong ya adok südi ta temolung melemi lir. Iba lendong nung asü-amaba meliasü. Iba mi remseptsü atema Duty Commander ASI Noklangsangba-i anir oa liasü.

Kohima district nung HCWs 1278 aser FLWs 517 nem mozü agütsüogo

Dimapur, Tsüklai/February 11 (TYO): Kohima district kübok session site balala nung tanü tashinung Health Care Workers (HCWs) 1278 aser Frontline Workers (FLWs) 517 nem COVID-19 mozü agütsüogo. District Immunization Officer, Kohima, Dr. Rupert Peseyie-i ashiba agi, Health Care Worker tem mozü agitsü asoshi February 20, 2021 ya tatem asütsü aser mop

up anogo pongu atema alitsü aser Frontline Workers pur mozü mezüing dose agitsü ya March 6, 2021 tatem asütsü.

February 10, 2021 nü IGAR HQ, 14 AR Tsiesema, 78 BN CRPF Sechu nungi Frontline Workers 305 nem mozü ya agütsü. Frontline worker atema February 11, 2021 nü IGAR (N), 78 BN CRPF aser 14th AR Tsiesema nung agia liasü.

Jakhama nung sepaitemi nübur temang repranga anepalu

Kohima, Tsüklai/February 11 (TYO): HQ IGAR (N) kübok 164 InfBn (TA) (H&H) Naga ajanga military civic activity nung shilem ka ama February 11, 2021 nü Jakhama village nung angati medical screening cum treatment camp ayongzüka liasü.

Meta talang nung alir aser tepetzük jenjang nung alirtem temang tendanga diabetes aser hypertension amala anepalutsü atema camp ya ayongzüka liasü. Iba mapang tanurtem densema nisung 63 temang anepalua liasü. Iba camp nung adener ya timba arishi küm 60 nungi tema

dang liasü.

Iba camp mapang Hypertension cases tasen trok aser Diabetes cases ti puteta mozü agüja liasü. Iba den külemi arishi küm 6 tanur electric shock ajanga takettsü abelen rangdoker alir ka camp nungya dena liasü. Iba tanur nema teyari agüja liasü.

Temang tendanga mozü agütsüba den külemi temang anema aser mürekmeja alitsü atema awareness agüja liasü aser nüburtem nem COVID-19 tashidak prokshiba nung jenbua alitsü atema tesayuba agüja liasü.

CANSSEA ketdangpurtem menden melentep



Dimapur, Tsüklai/February 11 (TYO): Confederation of All Nagaland State Services Employees Association

(CANSSEA) menden melentepba sentong ka CANSSEA conference hall, Themezie, Kohima nung February 10 nü agiogo.

2020-23 atema CANSSEA ketdangpurtem yamai alitsü

- | | |
|------------------------------|----------------------|
| 1. President | - Dr. Ilang |
| 2. Vice President | - Zubemo Tsanglo |
| 3. Vice President | - Chubayanger Aier |
| 4. General Secretary | - Dr. Hovithal Sothu |
| 5. Joint Secretary | - Yaongsanglee Chang |
| 6. Joint Secretary | - Yhungsenlo Kent |
| 7. Finance Secretary | - Akaho K. Yeptho |
| 8. Press & Information Secy. | - Siewatho Nyusou |
| 9. Women Co-ordinator | - Visetonuo Angami |
| 10. Women Co-ordinator | - Toshinano Ovung |
| 11. Treasurer | - Veyielo Doulo |
| 12. Advisor | - Dr. Tali Imsong |

Wokha nung Skill Development workshop agi

Dimapur, Tsüklai/February 11 (TYO): Rajiv Gandhi National Institute of Youth Development (RGNIYD), Sriperumbudur, Tamil Nadu ajanga sponsor süa, Mt. Tiyi College, Wokha nung February 9 nungi 10, 2021 anogotem nung Hospitality aser Tourism Industry nung ajemdaker ananü Skill Development for Employment workshop agia liasü.

Lanurtem luyim balala nung aintsü aser mapa inyaksü maongka atema training agitsü ya kanga tongtipang, ta Director RGNIYD, Sriperumbudur, Tamil Nadu, Professor, Sibnath Deb-i iba sentong nung ayongzüka liasü.

Iba workshop nung shisalen

sayur Dr. K. Zumomo Ovung, Ikavi Zhimomi, Henry Gonmei aser M. Chumrenthung Ezung nungertemi iba workshop indang omen nung ajemdaker onük balala nung practical demonstration sayua liasü.

Shisalen sayurtemi ajangshiba indang lemsatepba mapang, corporate learning aser skill training ka yanga nungdak lir, koba ajanga kaketshirtem takum nung timtem ajangtettsü asoshi renemshir, ta ashi.

Tananü buba nung Professor, Vasanthi, Registrar RGNIYD; Dr. Merebeni Patton aser Sentimenla Jamir, Associate Professor MTC nungertemia jemba liasü.

Assam: DU vice-chancellor mapa nungi anentsü



Dibrugarh, Tsüklai/February 11 (Agencies): Assam Angh Jagdish Mukhi-i Brehostibarnü Dibrugarh University Vice-Chancellor Prof Ranjit Tamuli, mapa nungi anentsüogo.

Fact finding committee kati Varsity senotsü amshiba nung ochi mashi inyakyim nung Prof Ranjit Tamuli densema aliba ngutetba sülen pa Dibrugarh University Vice-Chancellor mapa nungi anentsü.

Prof RNS Yadav, Dibrugarh University Vice-Chancellor (in-charge) asütsü shimogo.

Maneni Angh Jagdish Mukhi-i, taoba küm pongu tsüngda Dibrugarh University inyakyim bushitsüngdangtsü

atema high-level enquiry committee ka tentetsü asoshi tetuyuba agütsüogo.

High-level enquiry committee yagi University inyakyim nung senotsü tsütatepba, ochi mashi inyakyimtem, senotsü mashiyimi amshiba, tashi mashiyimi amshiba amala ken o dak rangloker bushitsüngdangtsü.

"Assam Angh Dibrugarh University Chancellor ama pa nem agüja aliba tashi amshia Dibrugarh University Vice-Chancellor Prof Ranjit Tamuli, osang tejangja ka magütsü tashi mapa nungi anenja atar. Tenük kuli agütsürtem anisatsü aliba nungi kümzüksü aser

University indang kuli tem yanglushitsü nungi jenboa ochi obendanga ka atema pa mapa nungi anenja atar," ta Raj Bhawan sangdong ka ajanga metetdaksü.

Hopta tetenzüklen Dibrugarh University registrar Hari Chandra Mahanta aser deputy registrar (finance & accounts) Diganta Borah na university senotsü ochi meshi amshiba nung densema aliba ngutetba sülen mapa nungi anentsüogo.

Vice-chancellor-i anir senotsü ochi meshi amshiba atema tesayur, kaketshir aser university kübok mapa balala nung inyakertermi longkak aita aruogo.

CM Conrad-i NS Tomar den ajurutepea sensak asem

Guwahati, Tsüklai/February 11 (Agencies): Meghalaya chief minister Conrad Sangma-i, Brehostibarnü state nung aluyimba ajungkettsü atema sentong balala benoka inyakba Union agriculture minister Narendra Singh Tomar nem metetdaksüogo.

Sangma tang New Delhi semdangba mapang lir aser Tomar densema pa Union minister aika den ajurutepogo.

Meghalaya nung Covid-19 wara poktetba ajanga aluyimba

nung kanga mejungi kongshi lir. Chief minister-isa, state nung agriculture aser allied sector tem atema centres of excellence balala amenoktsü asoshi Centre teyari aser temelaba meshia liasü.

"#Meghalaya nung GoI-i sentong balala benoka inyakba indang Hon'ble Union Minister for @AgriGoI, Sh. @nstormar Ji nem metetdaksüogo. Iba den state nung agri & allied sector tem amenoktsü asoshi Centre teyari aser temelaba

meshiogo," ta Conrad Sangma-i tweet asü.

Meghalaya sorkari aluyimba asüngsashitsü atema 'Restart Meghalaya Mission' kübok jenjang balala benoka inyakdar.

Aluyimertemi tsünütetba chiyongtsütem yokyatsüyatsü atema tanü tendakden apet shishilembadak amenoktsü asoshi senotsü agütsüogo.

Sorkarisa, aluyimertem nem agütsüba loan nung interest rate ajemtsüogo.

Statesorkari Assam Accord Clause 6 asadangdar: Centre

Guwahati, Tsüklai/February 11 (Agencies): High-power committee kati benokba Clause 6 report Assam sorkari asadangdar, ta Centre-i Parliament nung metetdaksü.

Iba osang ya Ministry of Home Affairs (MHA)-i Parliament nung metetdakja liasü.

"Assam Accord Clause 6 benoktsü atema Justice (Retd) BK Sharma tekolakser shimba high-level committee-i, parnok report Assam sorkar nem agütsüogo. Parnoki benokba onüktem tang asadangdar," ta Minister of State for Home Affairs, G Kishan Reddy-i Parliament nung metetdaksü.

Temetetsükaji, high-power Clause 6 panel-i parnok report Assam sorkar nem agütsür küm

ka dak tema aoer.

Iba ken o ya kecha masadangi Assam sorkari Centre nem indang indanga agütsütsü liasü.

Ajisüaka küm ka dak tema süiaka Clause 6 report ano Delhi metongi lir.

Assam Accord Clause 6 benoktsü atema shimba high-power committee-i parnok indang report 2020 küm state sorkar nem February ita agütsüogo.

Assam minister Himanta Biswa Sarma-i, taoba küm September ita ashiba agi, Home Minister Amit Shah-i, iba report Assam sorkar nem asadangdaksüner, kechiyong iba ken o nung constitutional aser legal temelenshitem nüngdaker.

Supreme Court-i Akhil Gogoi nem bail magütsü



Guwahati, Tsüklai/February 11 (Agencies): Supreme Court Brehostibarnü Raijor Dal President Akhil Gogoi-i bail atema benokba magizük.

Akhil Gogoi benokba bail tang mezüngbuba Supreme Court nung angadangogo.

Obendanger asem agi kumtetba Supreme Court bench kati Akhil Gogoi-i bail atema benokba Brehostibarnü magizük.

Keno angdangba Supreme Court obendangerter rongnung Justices NV Ramanna, Surya Kant aser Aniruddha Basu densema liasü.

January 7 nüa Akhil Gogoi-i bail atema benokba Gauhati High Court-i magizük.

Akhil Gogoi 2019 küm December ita nung tepuokdak yua lir.

2019 küm December ita Assam ajunga anokshia Anti-Citizenship Amendment Act (CAA) longkak aitba mapang mepetmesü adokba nung densema aliba nguteta Akhil Gogoi ya 2019 küm December 12 nü police-i Jorhat nung apu.

Pa ken o balala nung aija apu, kong sorkar aitsüba aser temzüng ozüing lateta aliba sülen manidakba densema lir.

Arunachal sorkari NCC cadets tem mapa balala nung anioktsü

Guwahati, Tsüklai/February 11 (Agencies): Sorkar mapa balala nung National Cadet Corps (NCC) cadet tem anioktsü atema state sorkar sentong aliba Arunachal Pradesh chief minister Pema Khandu-i, additional director general of NCC (North East Region) Ananata Bhuyan nem metetdaksüogo.

Khandu-i Bodhbarnü Bhuyan den Itanagar nung par kidang ajurutepea liasü.

Arunachal sorkari trained NCC cadets tem state police force aser sorkar department balala nung mapa tazüing alibatem nung anioktsü atema sentong ka yangludat.

"Trained NCC cadet tem State Police Force aser state

sorkar kübok tanga mapatem nung anioktsü atema sentong ka yangludat. Iba osang ya Major General Ananta Bhuyan, Addl Director General, NCC, NE Region den tanü ajurutepea mapang metetdaksüogo," ta Prem Khandu-i tweet asü.

NCC-i, Arunachal Pradesh nung kaketshir timba anioktsü meranga inyaka arudar aser iba den state kübok kinük kisang ajak nung sentong balala prokshitsü meranga arudar.

Arunachal Pradesh Angh BD Mishra-ia, state nung NCC cadet tem dang, nationalism tanüla renlokakja India sovereignty aser litsü kümzüka ayutsü atema inyaktü ayongzüik.

GOVERNMENT OF NAGALAND

DIRECTORATE OF HEALTH & FAMILY WELFARE

NAGALAND:: KOHIMA.

No.DHFW-5/D.Pharm/Part-II/2014/6779

Dated, Kohima, 10thFeb' 2021

ADVERTISEMENT

Directorate of Health & Family Welfare, invites interested local candidates to undergo 2(two) years Diploma in Pharmacy course for the academic session 2021 at Assam Medical College, Dibrugarh. The last date for submission of application form online is 15thFebruary 2021. Short listing criteria and other details are as follows:

1. 5 (Five) Nos. of Seats available.
2. Applicant should have cleared HSSLC (10+2) in Science Stream with minimum 40% in case of SC/ST candidates (Physics, Chemistry, Biology).
3. All relevant documents: HSLC & HSSLC Admit card, Mark sheet, Certificates, SC/ST Certificates, Indigenous Certificate, one recent Passport size photo, should be enclosed along with the application with complete address and contact no.
4. The maximum age limit is 25 years on or before 1stFebruary' 2021.
5. Application Form can be downloaded from the Department website: nagahealth.nagaland.gov.in
6. Last date of submission of Application forms online will be 15th February 2021. Duly filled in application in PDF format along with requisite supporting documents should be submitted through email to: hfw.recruitment2020@gmail.com
7. Selection will be done based on Academic Merit Marks.

SD/- DR. KEVICHUSA MEDIKHRU

Principal Director

Dte. of Health & Family Welfare.

Issued by DIPR



TIR YIMYIM YIMOBILEM (EDITORIAL)

DIMAPUR ROGONÜ, TSÜKLAI (FEBRUARY) 12, 2021

ANGH-ANG YIMSÜ ASÜR !

Nagaland nung state government taküm lia telok balala nem tashiyim agi saru sarudaktsüba aser gari lenmang mapang shitak nung merenemtetba anema ola adokba aser state government mapa inyaktermi India temzüng aser linük telongjem anema jembiba atema temerenshi agütsütsü metetdaksüba mapatem jagi state government madak angh-ang yimsü asür ta angatetter. Atangji, state nung angh ya, center aser state na tsüngda o tongdar amai ka dang lir, anungji state government shitak tashi itta ali tashibo state government-i latetba nung sign asütsüba dak alaka angh (governor) dak tashi tulukabo mali. Ajisüaka, kodang state government tashi maitlir mesüra ozüng shitak mamshitet kümdir, idangji state nung angh-i tebang aittsüsa akümer. Iba amajika masü nungbo state government-ji angh-i ashiba angaa anidaktsüba masü saka angh-ang state government-i ashiba angaa anidaktsüsa linük temzüng nung latetja lir. Item temzüng ozüng aser tanü Nagaland state tensa tia ya kodang reprangdangdir, atangji, pei mapa nung temulung agüja inyakba angh katibo tim masüba mapatem atalokba anema ola madok maremtsü. Aji oda, kodang state government mapa nung inyaker kati yimten nüchiso asoshi rarar ama jembidir, aji pa mesüra la mesüba kibur anema jembir asütsü. Ano, kodang state nung gari lenmang yanglurtemi pei inyaknüsü inyaka mapa renem menutsüdir aser tang Dimapur- Kohima lenmang nung long arangzüka aluba ajanga nübortem nungdak mesenzütet timtemba anema state government-i ola madoklir, nübortem tiaji pei lima nung alar kümer molumi nung alir asütsü. Aji oda, Dimapur-Chumukedima tsüngda lenmanga mapang talangka merenemteti amshia aliba taoba küm tatembanglen angh-i anogo lateta yutsüba ajanga dang taoba Chistmas masüdangsa renemer gari jajadaksüdagi. Tanga kasaji Dimapur-Kohima na tsüngda nübortem mejajadaksüi nokdanga aliba, angh-i tebang ia tanü nungi lapokdaksüogo. Ibaji kodang asenoki bilemdangdir, governor-ba ya-ang state nung temzüng ozüng aser lenmang yangluba mapatem nung kilonser aser ketdangser amai inyakba angur. Atangji, tanü asen lima tia ya jepaka nüktzü malu, shingai shitak meinyaktetter, kechiyong government aika kübok inyaker, anungji ajaki ajaklen tangatetter nung ozüng alema inyaker. Iba jagi asen lima ya majunger. Nisung shiai kibur ka ana ta masü aika tenzüker, iba jagi mapabo meinyak saka senbo ajak agima ta asüba timtem aser takoksa ataloker. Aji oda, Nagaland nungbo shiba yimsüsür aser shibabo contractor; shiba India temzüng kübok government mapa inyaker aser shibabo Naga yimten nüchiso asoshi nokdaker; shiba business inyaker aser shibabo pei tetsü tasoli yimten nüchiso asoshi rarar, itemji mejangjar aser mebendangtetter. Asenok kar kibur ana asem külemi tenzüker, kar rong ana nung tetsüng külenlen yur jajar aser asenok aikati, shin o nung ashi ama, amtsük ka yur tachia chinür aser takaa kanür. Ajisüaka, chira makatsü, anungji kanüra machitsüla. Tanü mapang papika ya Naga yimten nüchiso asoshi jembiba tatembang küma marutetba ya, tanga kuli agi masü saka asenoki tanga tajangzük anguba mapatem ajak toktsür yimten nüchiso kija asoshi, akhi asen tsüraburtemi nokdakba ama, timtem arema menokdaktetba ajanga lir. Government service nung Indiai agütsüba ita sen chia Naga yimten nüchiso asoshi jembiba nung koda asütsü ? India temzüng kübok ni India senso tajung ka, anungji India yimten aser linük telongjem asoshi nokdaksü ta nangzükba yimsüsür kati ni India nung masü ta koda shitettsü ? Aji oda, business inyaka Naga yimten nüchiso asoshi koda nokdaktettsü ? Aji oda, kodang asenoki aseni Naga yimten temeten asoshi jembiba o asen mapa na medemdangdir, aseni asen anema jembiba den kasa asenoki angatettsü. Iba jagi asenok India tsüngdang sentsü anur aser Nagaland angh nem state government-i inyaksüba mapa ajak nung amushidaksütsüsa akümer. Atangji, state government-i teinyaktsü meinyaktet alidang angh-i ajungshibaji junger, iba jagi government nung alirtem kümshidaksür saka kodang governor-ang Home minister aser ano pa-ang Highways minister ama inyaksüsa kümdir, asenokbo government nungi angati sen aser teyari agia anisungzüka alir dang ashi, khuretbo angh-ba nemang bendaktsür amai alimai repranger. Ibaji tanü Nagaland nung asenok noksa lir.

OLEMSABANG

COVID19 ASER TSÜNGREM ANGATETYIM

~ Mr. Zulunungsang Lemtur (Otongdar)

(Yashi adok nungi...)

3. TSÜNGREM SHIBAI CHIOKER

Yihuda nung lima Egypt lima alar tia nung alidang tajepba ola aser yisu kangkidong nung timatempa otsütem ajanga tsüngremi meimchir sendokatokba ami bilemer. Meimchir taküm nung timtem balala ajurudang aser iba sang nungi adoktsü lenmang mungütetdang aiben Tsüngrem mali amai bilema taküm nung tasüngdangba jenti asüngdangba mapang ajurua asen tamang jenjang tia anokshir. Iba ama tensa tia nung kodang T.Ken 22 ji züngdangra taküm nung teimla apu-oktsüa timtem, tekangshi aser temenen talenba nungi salatsüa, tajepba nungi tepela agi melenshitsüba angutsü. Iba ama mesükba ka Yisu kangkidong-i atuba nung sendokatokba aser maksü, timtem aremba agi alima asoshi tatokba, tashi aser tekümtet bener arutsüba angur. Item tajangshibatam ajanga tsüngrem shiba aria bilem nung talubu lir, pai nüburtem timtem tanüngba aser tajepba ola angashia talenba balala nungi salatsüa teimla tasen ka agütsür. Covid 19 aser tsüngrem angatetyim nunga asen tsüngrem teti taochi, aser temeim nung talubosa aochir aser pa teti meimchirtem timtem nungi anitettsü pa densemer.

4. TSÜNGREM SHIBAI NANGZÜKER

Yihuda nung angatetyim nung timtemba tebilemtsütem bentettsü asoshi bentshia aruba yimya kaji (retributive justice) liasü aser ibaji kanga metünga reta bentshiyonga aru. Saka tejen lai nung Yob taküm nung timtemtekangshi aser terokongba tia ajurudang Tsüngrem tejak ngutetba aki iba (retributive justice) angatetba kenyongi melenshitsür. Yob taküm nung tajangshiba balala nung pai tsüngrem tejak anguba jagi tanü asen tendak nunga Yob taküm nung am asen tsüngremi meimchirtem timtem mapang nung anasa alir aser pai asenok den tia tamajung nunga külemi jajar. Yob taküm otsü ajanga tsüngrem asenok den teti alitsü nangzükba angur aser kasa tenangzükba asenok den tanüa lir. Yob takümji asenoki tepetdak tia nung aser rishikangshia alirtem, aser timtem, shisabulu agi meketbanga alirtem shirnok taküm piyong nüktzü jenti neta tia tajungba ka ajurutsü yimla atar den metemdangtettsü akok. Taküm nung tamang yipru tia agi onshidang, Yisu kangkidong nung timtem aremba aser pa shia aruba mapangdong agi Tsüngremer taneptsü aser alima dangi nüchi bener arutsüba teimla tasen den tsüngrem asen den teti alitsü tenangzükba angur. Tsüngrem tejak timten mapang aser tia ajak nung ngutetba osang tajung ajanga tanü Covid 19 tashidak agi bener arutsüba timtem, tebilemtsütem aser alima loktiliba nung telemsa adokdaksüba ajak nung Tsüngremi nüji kümdaktsüba aser pai kümzüksü aser ajungkettsü aser pa asen den timtem mapang nung aliba teimla tasen ka asenok nem apuoktsür.

5. TSÜNGREM SHIBA ATANGJI

Yob kakat nung ochiba Tsüngrem indang angatetyim ya tatsütep aika keta aliba olong ka lir. Yob-er medemertem asoshi Tsüngrem ochishibaji meyipa merenshiba Tsüngrem nungi angatetba angutsü. Saka Yob asoshi Tsüngremji temeim, atangji, tematiba yimsüsüba nungi angatetta liasü. Yob tapu 40 aser 41 nung Yob-i angatetba Tsüngremji alima meimchir yimya, otsü, shisatsü aser temetetba nungi merajemtetba indang zülua angutsü. Yob taküm nung timtem, tekangshi aser tatalaba balala ajurur külen tesülen pa taküm meyipba yanglushitsüba nung Tsüngremji ochi O bendangba Tsüngrem ta tali rajema angatetter. Iba tangatetba nung Covid19 ajanga timtem, telemsa, tekangshi bener arutsüdang, Tsüngrem taochi aser temeim ajanga iba alima tebilemtsü atendanga anitsü.

Otem

Kija taküm aser loktilibaren nung yipru balala ajangshidang tasüngdangba aika rongnung "Kü Tsüngrem, Kü Tsüngrem na kong lir" ta asenoki asüngdang alir. Sensak tia, ochi mashiba, temeden maliba aser tekangshi tia aser Covid19 ajanga bentsür arutsüba tebilemtsü nung alidang temeim, taochi, taremsük, aser aria bilem nung talubusa alir iba Tsüngrem koma angatettsü? Timtem, shisabulu agi menepdang Tsüngrem ajemajema aliba indang rajemtsü aser aremtettsü kanga tasak aser aiben asen Tsüngrem ya T.Ken züluri tamang katetba Tsüngrem ama masü amai bilemer (T.Ken 115:5). Iba ama tia ka nung Yob kakat ajanga Tsüngrem indang angatetyim tasen ka agütsür. Aji asünung Covid19 tebilemtsü nung Tsüngremji shiba rajemshitsü tongtipang akümer aser lai tesayuba, tangatetba balala den medemdanga Tsüngrem angatetyim angatetsü nungdaka akümer. Covid19 wara nung timtemba balala nung Tsüngrema densema timatemer aser Pa temeim aser taochi agi meimchirtem taküm tia yanglushitsüa taküm nung teimla tasen ka bener arutsüa, taküm tajungba leni ilonga anir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Taruba ita Pope Francis-i anogo asemnü Iraq semdangtsü



February 11, 2021: Taruba ita Pope Francis-i anogo asemnü Iraq semdangtsü aliba sentong Vatican-i sangdongogo.

Iraq nung küm aika azü-tokshi liasü saka Pope-i Iraq semdangba ajanga loktiliba nung tarak keta aliba aneptsü, ta teimla nung 2019 küm July ita nung Pope Francis dang linük semdangtsü asüngdangba ama tang pai Iraq semdangtsü.

Yaküm December ita nung Pope-i pai Iraq semdangtsü ta sangdong; Akhidang Laishiba nung aliba Mesopotomia lima mezüng semdangba Pope ji Francis asütsü.

Pai iba linük semdangtsü atema jelia sentong yangludar, ajisüaka Islamic State kiralongrartemi pai semdangba mapang nung timtem agütsü nungbo ta aikati shisabulur.

Iba dak alia tang Iraq nung coronavirus tashidak-a kanga bulua prokdar.

Taküm küm tetenzüklen Vatican Secretary of State, Cardinal Pietro Parolin-i, "Tayongzükbatem lir, ajisüaka Pope-i Iraq semdangtsü kanga yongyar. Bomb lendong atalokba nung ajemdaker security tsütsü tebilemtsü lir, ajisüaka Pope-i Khristantem ajungshitsü atema Iraq semdangner," ta metetdakja liasü.

March 5, 2021 nikongdang Pope Francis, Iraq yimtiba, Baghdad tonga aotsü. Pai Iraq Tir, Barham Salih ajuruba sülen linük yimtiba nung aliba Syrian Catholic Cathedral of Our Lady of Salvation nung pa putirtem aser Arogo lenirtem den metetpelatsütsü.

March 6, 2021 nü pa Najaf-i aotsü aser linük nung Shia lenir, Grand Ayatollah Ali al-Sistani ajuruba sülen Ur nung tamangba lokti balala senden nung adentsü atema Nassiriya-i aotsü. Pa maneni Baghdad-i aruba sülen

Chaldean Cathedral of St Joseph Tenla kidang tekülem sentong nung adentsü.

March 7, 2021 nü Pope-i northern Iraq semdangtsü, tongbang nung asürtem bilemteta Mosul nung pai sarasademtsü aser helicopter ajanga Qaraqosh-i aotsü. Yangji pai Immaculate Conception Arogo nung Khristantem ajurutsü.

Iraq nung Kurdish region kübok Erbil nung aliba sports stadium ka nung pa tekülem sentong ka nung adentsü. Iba sülen March 8 nü pa Rome-i meyipa aotsü.

Pope-i Iraq semdangtsü, ta sangdongba mapang nungi Khristantemi kanga yongyaba den külemi tensa raksa nungbo, ta shisabulua bilemtsür.

Chaldean Catholic Arogo nung lenir kati, "Joko mapang tatsüka onok tetsübu nung alir, ajisüaka onok teimla mesama. Pope-i ozü lima semdangbaji Iraq tanaben soshiba temaitsü ka ama rateter," ta metetdaksü.

Iraq sorkaria Pope-i linük semdangtsü alibaji putiotsü ka asütsü, ibaji ajanga Iraq nung aser region nung yimjung temaitsü sayutsü, ta metetdaksü.

Iraq nung küm aika rara aliba ajanga tamangba yimsü balala amangertem ajak kongshiogo, aser parnoki tanela nung asüngsashi ka nüngdakba mapang nung Pope-i par lima semdangtsü.

Tawa totzü jenjang tajemba akümba agi linük rongsenkettsüng nung kongshiogo, iba denji külemi nüburtemi mapa agüjang ta akhangba den light densema service balala agüjang ta yimti yimdong nung longkak aitar.

Telangana nung Hindu nungertemi Laishiba ka rongdoktsü

February 11, 2021: January ita tatembanglen Telangana nung Khristantem tekülem sentong tagidak mapang nung Hindu yimsü alia amangertemi Khristantem amak; Hindu nunger jagi Khristantem dak azükba dang masü saka iba yimtsüng nung Khristan yimsü samatsüba temaitsü yimjak nung Laishiba ka rongdoktsüogo, ta International Christian Concern (ICC)-i metetdaksü.

January 31, 2021 nü Telangana state nung aliba Sarakonda yimdak Khristan kibong ka nung Khristantem adenshir tekülem sentong agia aliba mapang nung Hindu nunger nisung ter parnok nem timtem agütsü.

ICC den jembidang Pastor Zachariah-i, "Parnoki kecha meshii kü dangi aruba sülen kü dak azük tenzük. Parnoki kü dak aiben tsüngoktsüba sülen ni ali nung ondak. Parnokisa ni bena aliba Laishiba rakzük," ta metetdaksü.

Parnoki tanüngba Khristantem dak-a azük aser keyboard ka den speaker system aser microphone ka raksatsü, ta pastor-i metetdaksü.

Iba sülen Hindu nunger jagi Pastor Zachariah dang joko nai Sarakonda nung tekülem sentong ayongzüka magitsüla, mesüra nai timtem ajurutsü, ta amokmerena liasü.

Iba sülen Hindu nunger jagi Pastor Zachariah indang Laishiba moapu kati bener oa

yimjak nung rongdoktsü. Ibaji yimdak Khristan yimsü samatsüba temaitsü lir, ta parnoki ashi.

Zachariah ya Sarakonda nung aliba Pentecostal Prardana Madiram Arogo nung tongti pastor inyaker. Taoba mapangtem nunga Hindu nungeri parnok aiben amokmerena liasü.

Pastor Zachariah-i iba tatalokbaji police nem metetdaksüba sülen FIR ka benokba nung ajemdaker police-i Hindu nunger ter pronglaji pua jail nung puokogo.

District nung Khristantemi iba tatalokba anema longkak aita liasü. Iba rally nungji Khristan 2,000 dak temai shilem agiogo.

ANOGO ABEN TSÜNGREM DEN

Rongsen 1 Timoti 6:1-10

Rongsen meimba tamajung ajak adokdak tera. 1 Timoti 6:10

Tansütsü otsü ka nung shinü kati wako mejenloka yangluba shinü ka angu. Ibaji kanga tebur junga ngur aji pa meyong asütsü meka. Anungji pa den rapteptsü pur shiruru ajak meintoker, Pa indakji pelasita temer ashi: "Kü shinü!" Idangji pai jangratemtsü benjung nung atentsü apur. Aji oda pa jangraba süsüatemtsü atema, pai aginüba, pai aginüba ajak angutsü atema pa meketa jajaa aotsü merang. Yakta pa tetsü nung temenena nungji menalokatokba pai anetetta aküm. Pa tetsüng arakzütsü makok ta angateta pai yima aotsü merang. Pai pa tashikangtem ayipten, saka itemjia menatepatok. Tatem nung aniatoker, pai memerang. Idangji paper shinü jagi asüküma ayimoktsü, "Kü shinü."

Iba tansütsü otsü yagi shirnok rongsen sang nung apu parnok noksa sayur. Tenzük dang parnoki ashitsü, "Kü rongsen!" Saka alima tepela agi parnok puadaksür, parnok sasa tepuoker akümer. Parnoki agiatoker.

Rongsen nung kecha lendong meliaka, asenoki koba mezüngbuba südaksür iba dak aket. Kodang Khrista aser Pa tekümtet asen taküm nung mezüngbuba südaksüdir sama aoba osetemi alena aliba nungi asenok nüji akümer.

Kibuba Yisu, alima rongsen lar akümba nungi onok nüji kümjang aser Ne dak dang temulung lemjang. Amen.

Ghana nung prangpong amer telok kati Khristantem amak

February 11, 2021: Taoba Iba lendong nung yirua hopta Ghana kübok Kumasi alirtemji tang Komfo Anokye nung Khristantem aonung Teaching Hospital nung tekülem sentong agia lia treatment agidar.

auertemi prangpong amer Ghana linük nung amakdang Action Prayer Khristantemi kodanga timtem Ministry nungi züngsem asem ajangshia maru. Iba linük yirutsüogo, ta International nung nütsüng shilem 70 dak Christian Concern (ICC)-i temabo Khristantem lir.

Akhidang nungi iba linük Police-i ashiba agi, nung Muslim nunger aser Honibar (February 6) Khristantem tesünep anepdang züngia 2:00 ako nungdang lia aruogo, ajisüaka meta prangpong amertem jagi tangbo tamangba yimsü nung Khristantem amakba mapang ajemdaker nüburtem tetsübu nung nisung asem yirutsü. nung alir.

"Nisung asempronglaji Tekülem sentong tagidak injang agi tetsüng nung zübo mapang nung Khristantem keta yiru," ta Khristan kati amakbaji tamangba yimsü metetdaksü. nung ajemdaker amakba asü

Iba tatalokba sülen police tanga tebilemba agi amakar mejangja, ajisüaka iba ya Arogo züngsemtemi arrshi region nung Arogo atema küm 22, Sunday Ayine bo puer temaitsü tamajung ka lir, liasü. kechiyong region nung

Police-i bushisüngdangba Islamic kiralongrartemi mapang nung BB cartridges Khristantem amakba kanga ka den injang terep kar angu. bulua kümdar.

OLONG PAITEP # 5722

	1		2							3
4					5		6			
7										
			8						9	
10								11		
							12			
13							14			
15										

TIPIEN

1. Taochi sayuba - 10
4. Temezüng agi kongshi - 4
5. Ainer - 6
7. Chiyungnü - 3
8. Mi nung atsük - 5
11. Asen masü - 3
13. Lenmang ajurutepdak - 6
14. Yangi masü - 4
15. _ _ _ _ _ jang - 6

LANGTSÜNGLEN

1. Menungra - 6
2. Mi tsükloker mesepba - 4
3. Sūngo o tzü ajemba - 5
5. Temenemtsü tajung - 7
6. Idak - 4
8. _ _ _ _ ok - 4
9. Tebangi apuba kongki tapu ka - 6
10. Tashi endokba metet - 5
12. Tzü manung senzüba - 4

OLONG PAITEP # 5721 TELANGZÜBA

TIPIEN :

1. Rebeka, 4. Adam, 6. Yohan,
9. Zü, 12. Sayutsünger, 15. Ku,
16. Naman, 17. Abel, 18. Samuel.

LANGTSÜNGLEN :

2. Kan, 3. IM, 5. Anüng, 7. Amsü,
8. Yosep, 10. Sara, 11. Isak, 13. Yakob,
14. Nana, 16. Noa, 17. Am.



MR ALOK ASER DR COVID NA-1

- Alok** - Doctorba pandemic nung to nabo sen aika aaer südi tu na?
- Doctor** - Alok tokaraja, distancing to agi tetsürtem anogo shia endokaratsü purtem to ka danga maru adi!
- Alok** - Doctorba aji anogo nung kwi bosa aru aser anepaluba taa jia kwisa liasü?
- Doctorba** - Anogo nung tajimba agia nisung asembose aru aser taa ji Sen Meyirjang pongu liasü.
- Alok** - saka corona tendangba nung na sen aika ngur alitsüa tu?!
- Doctorba** - Tejimbishi positive putettsütsü tsübuba agi pei shirang den putepe pei sasa dang pharmacy nung alia chitepji onokbo aonbo mekepdok ama pora sukkha sütsüogo no?!

Lilir- MSJ

TANÜBO NAI LANGZÜANG

Q. NCAER (National Council of Applied Economic Research) ya _____ küm tenzük.

A.1956

B.1990

C.1985

D.1958

===== (Taruba adok nung onoki langzünsü)

YASHI ADOK TELANGZÜBA : Wetlands and Water

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :



Tepela
Tasoba Anogo



NAI-A YA METETTER MA?

AMAZON PRIME NUNG SAYUTSÜ ALIBA FILM ASER

SERIES: FEBRUARY 2021



- * Map of Tiny Perfect Things (Amazon Original Movie)
- * Clifford (Amazon Original Series)
- * Catfish
- * Life In A Year
- * The Broken Hearts Gallery
- * The Warrior Queen of Jhansi
- * Sonic the Hedgehog
- * The Boarding School: Las Cumbres: Season 1 (Amazon Exclusive)
- * The Informer
- * Top Class: The Life and Times of the Sierra Canyon Trailblazers: Limited Series (IMDb TV Original)

SUDOKU # 5764

9	1			4		7		3	2	4	8	5	1	6	9	3	7
5	7				3				7	6	9	8	4	3	1	2	5
2			6		7	1	5	8	3	1	5	7	2	9	8	4	6
			9	3					1	9	2	6	5	4	3	7	8
3	6		4	5	8	2			4	5	7	1	3	8	2	6	9
4	5	2				3	8		6	8	3	2	9	7	4	5	1
		5						4	8	3	1	4	6	5	7	9	2
	4	1		2	6		3		5	7	4	9	8	2	6	1	3
			8	1	4	6	2	5	9	2	6	3	7	1	5	8	4

TELANGZUBA # 5763

OJANG LUTEP # 5310

- NTESA :
- SEAR :
- PANMAG :
- NDE :
- PEAT :
- LOTEK :
- NGNU :
- ÜKON :
- LALBAA :
- ABIJEMTSÜL :

OJANG LUTEP TELANGZÜBA # 5309

NAGALAND CAPITAL KOHIMA MASÜ TANGA DISTRICT
KATI MELEN TAJUNGBA SÜLA

TAN HOPTA ATEMA - KOMA SÜLA ?

Q. Arogo nem Tsüngremer mapa inyaksü asoshi peii ajangzüktetba rongsen nungi 10% tenla agütsüba ama government nema terenlok mapa inyaksü atema 5% agütsü nunga koma süla ?

Olong 20 shi nung February 12, 2021 tashi nung iba telangzuba ya onok dangi (e-mail - tiryimiyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzübatemji taruba Honibarnü adoktsütsü.



Amritsar (Punjab), February 11, 2021: Brijesh Barnü Amritsar nung Congress lenirtem aser party nung inyakerteri linük nung gari totzü jenjang kanga atuba atema Centre sorkar anema longkak aitba noksa nung angur.

India aser China sepaitem LAC nungi ainshitsü: Rajnath Singh

New Delhi, February 11, (Agencies): India aser China sepaitemi Ladakh kübok arrtsülen nungi sepaitem ainshi tenzükba sülen anogo ka lir Brijesh Barnü Rajya Sabha nung Union Defence Minister, Rajnath Singh-i anüdoklen Ladakh nung tang tensa osang metetdaksü.

Rajya Sabha nung defence minister-i, anüdoklen Ladakh nung aliba LAC nung point kar nung sepaitem lemezüksüba aser patrolling senzüba dak sendakba nung tongtibang onük kar bentetogo, ta metetdaksü.

"Asenoki China den maneni ken o jembiba ajanga Pangong awatsüng north aser south tsütsü sepaitem ainshitsü atema tezüngzüktep agiogo. Iba tezüngzüktep agiba sülen India

aser China nati shilem lemsar sepaitem ainshitsü. India-i LAC nung tesendaktep junga yuner aser yimjung atema inyaker," ta Rajnath-i metetdaksü.

Paisa, "Pangong awatsüng nungi sepaitem ainshiba sülen maneni tanüngba ken o ajak bentetsü atema taruba ghonda 48 tsüngda senior commanders senden ayongzüka amentsü," ta metetdaksü.

"Line of Control nung tensa tesünep nung alitsü atema sorkari inyaker. Mapang ajak nung India-i linüktem tsüngda tesendaktep ajungtsü atema inyaker," ta pai ashi.

"China-i LAC nung raraba hadir aser injang aika rizünga lir. China anema onoki mera agia inyakogo. Asen tasütait sepaitem

tongtibang points nung lir. Linük atema parnoki kecha marendaki inyaksü ta parnoki kuli sayuogo. Onoki linük anaprongla nem LAC akhümtsübudaktsüner. LAC nung temelenshi kecha mali," ta pai metetdaksü.

"1962 küm rara sülen China-i ali 38,000 sq km atsünga liasü aser Pakistan-i ozüng alema Ladakh nung China nem ali 5,180 sq km agütsü. Arunachal Pradesh arrtsülen China-i India nung li 90,000 sq km ji parnok indang ta jembir. India-i ibaji magizüktetsü. Linük anapronglai inyak nungang linük ana tesendaktep ajungtsü ta onoki jembiba arur. China den ken o jembiba ajanga asenoki kecha takoksa mangu," ta paisa metetdaksü.

Social media nung osang tai proker nem temerenshi agütsütsü: Ravi Shankar

New Delhi, February 11 (Agencies): Brijesh Barnü Union Law Minister, Ravi Shankar Prasad-i, social media ajanga nüburtem nem tashi agütsüba atema sorkari social media akhümtsübur, ajisüaka osang tai proksü aser rara adokdaksütsü atema social media amshira temerenshi agütsütsü, ta metetdaksü.

Rajya Sabha nung jembidang Law Minister-i, "Onoki social media kanga

akhümtsübur, iba ya ajanga nüburtem nem tashi agütsüogo. Social media ajanga Digital India program nung shilem tulu agir. Ajisüaka osang tai proksü mesüra rara adokdaksütsü atema social tim mesü amshira temerenshi agütsütsü," ta metetdaksü.

Centre sorkari legal tsütsü temepishiba ka agütsüba dak sendakba nung Bodhbarnü Twitter-i, parnoki mera aika agia inyakogo, aser item

rongnung Twitter ozüng alema inyakba atema nisung 500 dak tema indang accounts teti atema anentsüogo, ta metetdakja liasü.

Centre sorkari Twitter dang "farmer genocide" hashtag amshiba indang tweets aser accounts agienang ta tuyuba dak sendakba nung Secretary of Ministry of Electronics & Information Technology (MeitY) aser Twitter ketdangsertem senden ka menogo.



February 11, 2021 nü Ahmedabad nung aliba Rajiv Gandhi Bhavan nung Civic body election aser District Panchayat election atema party manifesto sayaba sentong nung Congress lenirtem- Siddharth Patel, Paresh Dhanani, Amit Chawda aser tangartem adenba noksa nung angur.

Union Budget 2021-22 ya takartem atema lir: P Chidambaram

New Delhi, February 11, (Agencies): Brijesh Barnü Rajya Sabha nung Indian National Congress-i Union budget agi melung masüba lemsatepa Centre sorkar aitsü.

Taoba mapang Union Finance Minister, P Chidambaram-i, "Iba budget ya takartem atema, takartem indang aser takartemi yangluba lir. Iba budget ya India nung nütüng shilem 1 atema dang lir; linük rongsen shilem 73 parnoki (takartem) azüoker," ta metetdaksü.

Congress leniri 2021-2022 budget aitsüba den külemi ruling party-i rongsenkettsüng ketdang mesüteter, ta aitsü.

Budget onük nung o toktepba mapang Chidambaram-i, "Iba budget ya takartem atema, takartem indang aser takartemi yangluba lir. Iba budget nung India nung sensakertem atemabo kecha mali, parnok maneni timtemer. Iba budget ya linük nung nütüng shilem 1 atema dang lir, parnoki India nung rongsen shilem 73 azüoker," ta metetdaksü.

"Linük rongsenkettsüng ainba mezünglongi akümbaji sorkari magizüker; coronavirus wara marudanga küm ana tashi linük rongsenkettsüng ainba jenjang mejungi liasü; ibaji atangji," ta paisa metetdaksü.

"Mapa majeter, ta olong amshibaji Finance minister-i agizükteter. Ni Parliament nung

iba dang nungjagi olong tesashiba mamshitetsü. Küm asem tashi rongsenkettsüng junga ketdang mesütet, iba tetezü 2020-21 atem dangbo 2017-18 nung aliba amai asütsü," ta pai ashi.

"Ni jembiba ya tetzüa liang, rongsenkettsüng aintsü asadangteta alibaji 2021 küm atem dangbo tajemba asütsü. Sorkari GDP ainba shilem 14.8 asütsü ta asadangtetogo, iba sülen shilem 11 per asütsü ta ashi. Kü ongko nungbo, shilem 9.4 mesüra 8.4 dang asütsü, ibaji tim dang, ibaji coronavirus wara ajanga lir. Kanga mezümeküma mejembitsüla. GDP ajungtsü atema nenoki küm 2-3 agitsü," ta Chidambaram-i ashi.

Chidambaram-isa, tang mezüng budget onük jembidang defence metetshi aser health atema sen ajema lemezüksü, ta ashi. Congress-i iba budget magizüker, ta shia pai, "Anungji onoki melung mesüi iba budget anema ola adoker," ta ashi.

"Alima nung economist ajaki asenoki demand ajungshitsü, ta shiogo aser demand ajungshitsü atema nüburtem ket nung sen amoktsütsüla. Sorkari iba lenla nung tamakok nguogo. Tesüiba ita 36 nung ajangshiba nungi nenoki lesson mangazüker. Nenoki lesson magiba ajanga ano ita 12 takoksa angutsü aser sensakertem kanga timtemtsü," ta pai metetdaksü.



February 11, 2021 nü Chamoli district kübok Raini yim anasa IIT technician kati drone amshia survey agiba noksa nung angur. Taoba Amongnü Chamoli nung rürjep anenzüka aluba ajanga Dhauri Ganga ayong nung tzu tali metsünga liasü.

Chhattisgarh-i Bharat Biotech indang Covid vaccine ashishir

New Delhi, Tsüklai/February 11 (Agencies): Brijesh Barnü Chhattisgarh state sorkari, parnoki Centre sorkar dang linük nung yangluba coronavirus vaccine tatembangbuba stage nung tendanga kuli mangu tashi iba vaccine state dangi supply asüba anena atang ta shiogo, ta metetdaksü.

Alima nung coronavirus tashidak timba putetba linükji US lir, iba sülen tanabuba linükji India lir. India nung tang tashi nung front-line workers million 7 dak tema nem Bharat Biotech-i yangluba Covaxin vaccine aser AstraZeneca/Oxford University indang vaccine agütsüogo.

Tang tashi nung Centre sorkari Covaxin dose million 10 aser AstraZeneca indang vaccine million 21 mangaogo.

Bharat Biotech-i, nisung 26,000 dak Covaxin tendangba

indang osangji taruba ita sangdongtsü, ta metetdaksüba sülen Epidemiologists aikati, iba vaccine amshitsü atema license kanga aritepa agütsü, ta aitsüdar.

Nütüng million 32 aliba Chhattisgarh state sorkari, "Covaxin amshiba atema nüburtemi tebilemtsü akar. Ibaji clinical trails stage tasembuba metembangba ajanga lir," ta metetdaksü.

State health minister, TS Singh Deo-i iba dak sendakba nung Union Health Minister, Harsh Vardhan dangi shidi ka zülüogo aser pai kasaji twitter nunga lemsatepogo.

Singh Deo -isa twitter ajanga, Covaxin vials nungji vaccine expire asüba anogo zülia mali, ta shia Union Health Minister dang Covacin vaccine state dangi supply asüba anena atang ta metetdaksüogo, ta lemsatep.

Myanmar nung nisung tali apur, Biden-i tenokdangba agütsütsü melar

Naypyitaw, Tsüklai/February 11 (Agencies): Taoba hopta mitkar tashi amshia sorkar atsüngdokba sülen nisung jenti pua aruba mapang ano yimsüsür menden nungi atsüngdoker aliba Myanmar lenir Aung San Suu Kyi den yariteper ka puogo, ta party ketdangsürtemi Brehostibarnü ashi, aser Washington-i mitkar lenirtem nem tenokdangba agütsütsü mapang tonga arur.

Kyaw Tint Swe ya Suu Kyi kübok office of the state councillor indang minister ka ama inyaka aru. Suu Kyi ya February 1 nü mitkar tashi amshia sorkar atsüngdokba mapang apu.

Suu Kyi indang 'right-hand man' ta züngshisang Kyaw Tint Swe ya civilian sorkar atsüngdoktsü anogo ishika lia mitkartem den jembishinüa aruba mapang la tenüing nung oa jembia liasü.

Suu Kyi'er National League

for Democracy (NLD) nung information committee züngsem Kyi Toe-i ashiba agi, Kyaw Tint Swe aser dangar pezü taoba sorkar den sendaktepa alirtem yasüing parnok kidang nungi anir ao aser taoba electoral commission indang ketdangsürtem ajunga apu.

November election nung ashikülak mapa inyak ta aitsüba sülen mitkartem tashiyim amshia sorkar atsüngdok. Iba election nungya NLD teloki takok tulu ngua liasü aser electoral commission-ibo ashikülak mapa inyaka mali, ta ashir.

Myanmar ketdangsürtemi telangzüba kecha agüja mali aser osangbener temia parnok apuba kuli tejangja mongutet. Sorkar atsüngdokba sülen ketdangsür aika puogo aser item rongnung NLD lenirtem jenti dena lir.

Brehostibarnü tashinung longkak aitertem anogo

trokbuba tesem balala nung adenshi.

Civil disobedience movement busema linük yimtiba, Naypyitaw nung aliba lenmangtem nung nisung noklang aika adenshia mitkar yimsüsüba anema yimyim ayim aser Suu Kyi busema placard tem bena liasü.

Nüburtemi yimya balala nung longkak aita arur aser Brehostibarnü Yangon nung teburtem dena skirt tatsü agir liasü. Sign ka nungbo "Onoki democracy tanaben mangu tashi onok skirt mesemzütsü," ta zülua liasü.

Yangon nung aliba Chinese embassy nunga longkak aiter jenti adenshia liasü, aser Beijing-i mitkar lenirtem busemer ta tai tongloksü, saka China-i yamaji masü ta ashir.

Placard ka nung "Myanmar busemang, nisung ka kijai yimsü asüba meyaritsüla," ta zülua liasü.

Longkak aitertem ya United

States, Russia aser France embassy tem aser United Nations indang office tem anasa adenshia liasü. French ambassador temao adoka parnok ajuru aser pai democracy aser pua alirtem chioktsü akhangba nung nokdaka lir, ta ashi.

Mitkar tashi amshia sorkar atsüngdoker nem tenokdangba tasen agütsütsü atema US Tir Joe Biden-i Bodhbarnü executive order ka agizükogo aser sepai tanishirtem dang talenba salar civilian lenirtem pua aliba chioktsü nenshia akhang.

Washington-i tenük yoktsü mezünpur tain hopta jangjatetsü aser Myanmar nung mitkar tanishirtem nokdangtsü atema mera balala agir, United States nung Myanmar sorkar meyong sen billion \$1 ngutetogo.

"Onoki export controls nunga tenokdangba tesashi agütsütsü. Burma sorkar ajangzüka US rongsen onoki soita ayur, aser onoki Burma nung aliba nübur indang indanga ajangzüka health care, civil society telok aser dangatem onoki maneni nungiter," ta Biden-i White House nungi ashi.

Washington-i mitkar tashi amshia sorkar atsüngdokba lenir Min Aung Hlaing aser

danga mitkar lenirtem dak tenük yoktsü amai lir, shirnok Rohingya Muslim aser danga kin tilatem merenshia amshiba mechi US-i 2019 küm tenokdangba agüja lir.

Parnokisa mitkartem shilem aliba company tem nunga tenük yoktsü akok, aser item rongnung banking, gems, copper, telecoms aser aben süoshi yangluba sector tem dena lir.

United Nations indang temaba human rights tentet ajanga Hokulbarnü pangzüing ka renemtsü asadangba mapang lir, koba mitkar tashi amshia sorkar atsüngdokba aija Britain aser European Union ajanga yanglua lir.

Saka China aser Russia linüki iba pangzüing nung tai aputsü amai lir, kechiaser linük ana ya Myanmar indang armed forces den tesendaktep lir.

Arishi küm 75 tain Suu Kyi ya democracy atema nokdakba mechi 1991 küm Nobel Peace Prize angu aser Rohingya nunger timtem mechi alima nung la sentsü ajema kümaka lar linük nungbo la ya kanga nüngtugu lir.

Taoba mitkar lenirtem yimsüsüba kübok la küm 15 jungnüa kidang pua ayu aser tang lai ozüing alema walkie-talkie trok bendanglen nungi bener aru ta ken o benoka lir.

US-China tesendaktep: Biden o Xi na phone nung jembi

Washington, Tsüklai/February 11 (Agencies): US Tir Joe Biden-i China Tir Xi Jinping den mezüing jembiba mapang Xinjiang nung meimchir temeden alema tashiyim amshiba ken o benok, ta White House-i ashi.

Biden-isa Xi den shishilempaba, Hong Kong nung nübur ola madokdaksüi nembanga ayuba aser tang Taiwan den mangatetep aliba indang onüktem benoka jembi.

China state television ajanga ashiba agi, Xi-i Biden dang tesendaktep mejungra linük anaprong atema takoksa asütsü, ta tekümdangtsü ashi.

Shishilempaba, itdangiterba aser tashidak wara mechi linük ana tsüingta tesendaktep tamajungba kuma lir.

China-US tesendaktep ya linük anaprong aser alima ajunga atema kanga tongtipang lir, aser iba yongji Beijing-i Washington nung aliba administration tasenba dang tesendaktep yanglushitsü shijen shia arur, koba Donald Trump mapang tamajungba akum.

China nung Lunar New Year atongtsü anasa lia lenir ana tsüingta phone ajanga jembiba ya yimya tajung ka ama ajiteter.

Tena jembiba sülen Biden-i, "America nübur ajangzüka mapang dang ni China den inyaksü ta ni shiogo," ta tweet süa liasü.

White House-i sangdong ka nung ashiba agi, "Tim mesüi rongsenketsüing yimya amshiba, Hong Kong nung nübur anema tashiyim amshiba, Xinjiang nung meimchir temeden alema inyakba aser Taiwan densema region nung pei sasa pei dak temolung lema inyaksangshiba atema tiri süoki ia bilemba indang metetdaksü."

Xinjiang province nung Uighurs nunger mullion ka dak tema pua lir, ta rights group temi ashi, saka China-ibo ibai "re-education camps" dang lir, ta ashir. Muslim kin tilatem timba sür aliba Uighurs tem tashiyim amshia mapa tasak taret inyakdaksüba aser tetsürtem tashiyim agi nu menden indoktsüba kuli tejangja lir.

Saka China-i item osang ya magizüker.

Lenir ana yagi alima nung COVID-19 tashidak wara den raratsü, global health security, tzü-mopung melenba aser nok-o-nü tesashi yangluba nokdangtsü indang jembia liasü.

Iran nuclear accord dangi Qatar meyipa arutsü inyakteper

Doha, Tsüklai/February 11 (Agencies): Region nung tensa tajungba kati aruaksütsü atema Qatar ya 2015 Iran nuclear agreement dangi tanaben meyipa arutsü inyakteper, ta Qatar indang foreign ministeri ashi.

Tain hopta Foreign Minister Sheikh Mohammed bin Abdulrahman Al Thani aser US Special Representative for Iran Robert Malley aser US National Security Advisor Jake Sullivan nungertem tsüingta anaben tashi phone ajanga jembitepba osang metetdaksüba mapang iba osang ya ashi.

Iran-i tashi tulu linüktem den nuclear tezüingzüktep yangluba tanaben asentenshitsü atema US Tir Joe Biden indang administration ajanga lenmangtem bushir, kechiaser iba kübok nuclear sentongtem

yutsüba mechi tenokdangba agüja alibatem agentsü. Taoba Tir Donald Trump-i US ya iba tezüingzüktep nungi 2018 küm agien aser Iran nem tenokdangba tanaben agütsü.

"Nuclear agreement dangi tanaben meyipa arutsü atema State of Qatar-i yimtenren aser diplomatic yimyatem ajanga tensa tajungba akumtsü atema inyaker," ta Al Thani-i ashi.

Qatar indang geographic location yagi Iran aser US tetsüingtai aiba nung yaritetsü, ta hopta tetenzüklen US Central Command tekolakba, General Kenneth McKenzie-i online sensaksem ka nung shir lia iba osang ya arur.

Qatar-i Iran aser US den osangola maneni agiteper, kechiaser Qatar ya linük anaprong den tesendaktep lir, ta Al Thani-i ashi.

Iran aser par kidanger Arab linük tsüingta jembishinü tenzükshitsü teimla lir, ta Doha-i ashiba sülen Qatar-i Gulf linüktem Iran den jembishinütsü ayongzüka atema taoba ita Iran indang diplomat Mohammad Javad Zarif-i pelashishia agizüka liasü.

Qatar ya Iran den gas field tuluka lemsatepa amshir aser küm aika Gulf Arab linüktem dang Iran den jembishinütsü ajangshia arur. Middle East nung Iran-i mangatetep adokdaksür, ta Saudi Arabia aser United Arab Emirates nati aitsür, saka Tehran-i ibaji magizüker.

Trump administration-i Gulf nung Iran anema lungjemer nokdaksü atema inyak, aser iba mapang Gulf Arab linüktem aser Israel tsüingta tangatetep kati arutsü ajangshia liasü.



Southern Gaza Strip nung aliba Khan Younis yimti nung Palestine nungertem parliamentary aser tir election atema tenüing zülüokba noksa nung angur. Palestine nunger litsü ajunga nung general election agitsü atema Palestine nunger telok balala Egypt yimtiba, Cairo nung adenshia senden amendang molungtepa liasü. Parliamentary aser presidential elections ya May 22 aser July 31 anogotem agitsü lemtetogo.

Hong Chau-i 'The Whale' nung shilem agitsü



New York, Tsüklai/February 11, 2021 (Agencies): Taruba project 'The Whale' nung Hong Chau-i shilem agitsü terenemba lir. Darren Aronofsky indang

film tasenba nung arishi küm 41 tain actress Hong-i Brendan Fraser den külemi shilem agiba angutsü.

Osang ajanga angazükba agi, Samantha Morton aser

Sadie Sink naprongla iba project nung anioktsü.

Iba movie ya Samuel D. Hunter indang nüngtugu jilushi otsü ka nung ajemdaker yanglutsü aser pa indang project ya film kati yanglutsü ta osang angazüka pai pelaba lemsatepogo.

"Ni züluba jilushi ka screenplay kati melentsü osang angashia ni kanga pelar aser ni meranga inyakba ka jenjang temaba nung ajungkettsütsü maongka anguba atema nümatanga bilemer," ta Samuel-i ashi.

Iba film atema production maparentem taruba ita nungi tenzüksü terenemba lir aser iba ya Darren indang project taruba project ka alitsü. Horror film tasen - Adrift nunga pai Jared Leto den longjemer inyaktsü sentong lir.

Acting tsütsü, Hong-i nüngtugu TV series 'Watchmen' aser 2017 küm Downsizing' nung Matt Damon den külemi shilem agiba nguogo.

Mahindra-i model kar nung sen 80,000 ajemtsür

New Delhi, Tsüklai/February 11, 2021 (Agencies): Mahindra & Mahindra-i XUV500, Marazzo, Scorpio aser XUV300 densema product line-up nung discount tulu agütsütsü renema lir. Customer tali atsüa arutsü aser gari sales timba tudaktsütsü nükjidong nung Company-i iba offer agütsür.

Ano külen, item model alitsü bilema alirtem atema company ajanga sangdongba offer ya osang tajung alitsü. Iba offer ya February 2021 tashi dang agütsütsü.

Tejangrartemi, cash discounts, corporate benefits, exchange bonuses aser complementary accessories nung iba tajangzüik agitettsü.

Dealer ajanga agütsüba discount offer tem tsünglanglen agüja aliba ama alitsü.

*Mahindra XUV500: Iba model ya sen 36,800 cash

discount densema sen 80,800 tashi discount benefits agütsütsü. Iba gari jenjang sen lakh 13.83 nungi tenzüka angutsü. Tanga offer rongnung exchange bonus - sen 20,000, corporate discount - sen 9,000 aser sen 15,000 alang accessories densema lir. Iba SUV ya BS6-compliant 2.2-litre diesel engine nung angutsü, koba ajanga 155hp/360Nm agütsür.

*Marazzo: Talirtemi, iba Model nung cash discount - sen 20,000 densema sen 41,000 alang benefits angutsü. Dealer ajanga exchange bonus - sen 15,000 aser corporate discount - sen 6,000 agütsütsü. Marazzo nung BS6-compliant 1.5-litre diesel engine keta lir aser engine ajanga 122.6hp aser 300Nm torque agütsür.

*Mahindra Scorpio: Sen lakh 12.67 alang Scorpio ya exchange bonus - sen 15,000

densema sen 39,500 discount nung angutsü. Talirtemi, cash discount - sen 10,000, corporate discount - sen 4,500, aser sen 10,000 alang accessories agütsütsü renema lir. Iba gari nung BS6-compliant 2.2-litre mHawk diesel engine angutsü, koba ajanga 140hp/320Nm agütsür.


*Mahindra XUV300: Sen lakh 7.95 nungi tenzüka XUV atema cash discount - sen 10,000, exchange bonus - sen 25,000, corporate discount - sen 4,500 aser sen 5,000 alang accessories agütsütsü. Iba model ya 110.1hp 1.2-litre turbo-petrol motor aser 116.6hp 1.5-litre diesel densema engine tapu ana nung angutsü.

Phek DPDB senden menogo

Dimapur, Tsüklai/February 11 (TYO): Phek district DPDB senden February 10 nü Phek DPDB Conference Hall nung menogo. Iba senden ya Deputy Commissioner aser Vice-Chairman DPDB, Phek, Razuovolie Dozo lenisüba kübok agia liasü.

Senden nung pai, züngsemtem dang senden nung teti adentsü aser pei department tebilemtsütem lemsateptsü ajungshi.

Senden nung Phek Civil Hospital nung Conference Hall, asür Dr.Wetshelo T.Mero tenüng nung jatsütsü benoka sensak asem aser temaba jenjang nung aliba ketdangsertem dangi abentsü lemtet. DIO, Phek, Dr. Kolhitso-i, district nung vaccine agütsüba osang agüja liasü.



Mumbai, Tsüklai/February 11, 2021: Brehostibarnü, Mumbai nung Jazz pianist Louiz Banks (achiji) arishi küm 80 ajungba nüngtem nung 'Louiz Banks- A Symphony of Love' kakat ka sayaba yangi angur.

Mulungnen



TASOBA ANOGO :
14/02/1921

TASÜBA ANOGO :
08/02/2021

Obala asür **MAONGKABA** (Waromung), shiranga aliba mapang nungi tasü nü tashi shirnokisa mapang, nübu, rongsen aser sarasadem agi nungita yaritepogo, nenok ajak dang kangasa pelaba iba osang kakat ajanga lemsateper . Tsüngremi nenok mapa tajung moajangma.

Kinungtsü, Chirnur aser kinungertem.

Piles Anepaluba - Kabiraj dang alakteta pelaba metetdaksür. Piles, Fistullah, Gastric, Sinus aser Tonsil-Athjma agi ni kangshia liasü aser Rectum nungi azü alu dang mapang talangka item timtem nungi junga taneptsü mang. Ajisüaka, tang **Kabiraj H. Umar Chesam contact no. 7627998690 Address: Near Nagaland GATE, Lahorijan K/A Assam,** tetuyuba nung anidaka surgery kecha magii (non-surgical) anepalur anogo ishika tsüngda ni taneptsü ngua liasü aser iba sülen tanü tashi kü temang nung timtem kecha mali. **Time: 9 AM - 5 PM**
Yours sincerely - Lorenzo Marry, Add: Lothay Colony, Dimapur



METETDAKTSÜR

Dimapur Changtongya Fellowship Sentep 14th February 2021 Calendar nung 1 PM ta lir saka 3 pm ta melener.

Mapang tensa agi yamai alitsüsa akümer.

Dimapur Area Chuchuyimlang Senso Tamang Telongjem **METETDAKTSÜR**

14th February 2021 Sentep Sendong nung 1:30 P.M ta agütsüa lir aji 2:30 PM ta melener ajak metema arutsü mepishia metetdaksür.

(A. Renemla) Convenor, DACSTT

Motorola-i 'Moto E6i' saya



India nung sen 9,999 agi angutsü.

Design tsütsü reprangdangra, Motorola Moto E6i ya Motorola Moto E6s ama lir, kong waterdrop-style notch aser pill-shaped rear camera module angutsü. Iba smartphone nung 6.1-inch HD+ den tezü nung narrow bezels inokja lir. Moto E6i nung Unisoc Tiger SC9863A chipset den 2GB RAM aser 32GB onboard storage keta lir. Smartphone ya Android 10 'Go out of the box' ajanga achaayangtsür, koba Android 10 indang version tilaba alitsü. Android indang Go edition ya entry-level specifications aketba smartphone tem atema lir.

Motorola Moto E6i tesülen dual camera setup angutsü, kong 13-megapixel primary camera den f/2.2 aperture aser 2-megapixel secondary camera den f/2.4 aperture dena lir. Selfies aser video calling atema iba smartphone tejaklen 5-megapixel camera den f/2.4 aperture inoktsüogo.

Item feature dak alaka, Motorola E6i nung Bluetooth v4.2, Wi-Fi 802.11 b/g/n, GPS, Glonass aser 3.5mm headphone jack keta aliba angutsü. Iba phone nung battery tasazük 3,000mAh lir aser Micro-USB port ajanga 10W charging support asür. Motorola E6i tuozük gram 160 aser 8.5mm temelem alitsü.

New Delhi, Tsüklai/February 11, 2021 (Agencies): Motorola-i brand indang Moto E6 smartphone lineup nung Motorola Moto E6i bendenlokogo. Iba budget device tasenba ya Unisoc Tiger SC9863A SoC aser Android 10 (Go Edition) out of the box ajanga achaayangtsür. Tanga feature tsütsü reprangdangra, Moto E6i nung dual-rear cameras aser 3,000mAh battery keta aliba angutsü.

Tang, Motorola E6i ya Brazil nung yokdar aser iba smartphone 2GB + 32GB option jenjang BRL 1,099 (sen 15,000) alitsü. Iba smartphone ya Titanium Gray aser Pink sentsü nung Motorola Brazil website ajanga angutsü. Lenovo meyong Motorola-i tanga shishilembadak iba smartphone sayatsü asoshi osang tejanga magütsü. India nung Motorola-i sen 7,999 yong Moto E6s yokdar. Iba smartphone den tatongtep Moto E7 Plus 4GB + 64GB ya

Vijay Hazare Trophy 2020-21: NCA-i Senior Mens Cricket Team asayartem sangdongogo



Dimapur, February 11, 2021

(TYO): Aruya aliba Vijay Hazare Trophy 2020-21 atema Nagaland Cricket Association-i Senior Mens Cricket Team asayar tenüing sangdongogo.

Senior Mens Cricket Team nung, Jonathan Rongsen (captain), Hokaito Zhimomi (vice-captain), Sedezhalie Rupreo, Hem Bahadur Chetri, Joshua Ben Ozukum, Akavi Yephtho, Imliwati Lemtur, Nagaho Chishi, Hopongkyu Sangtam, Khrievitso Kense,

Merenkaba Jamir, Nzanthung Y Mozhui dena lir.

Stand-Byes: Peteneizo Rupreo, Oren Ngullie, Moakumzuk Tzudir, Mughavi Sumi aser Yugandhar Singh alitsü.

Professional Guest Players: Stuart Binny, Shrikant Mundhe aser Chetan Bisht nung dena lir.

Support Staff : Toika K Awomi (Team Manager), Kawaljeet Singh (Team Coach), Arzoo Raj (Team Fielding Coach), Purnendu Jena (Team S & C

Coach) aser Krishna Prabhu (Team Physio)

MATCH FIXTURES:

21-02-2021: NAGALAND

Vs SIKKIM

23-02-2021: NAGALAND

Vs MIZORAM

25-02-2021: NAGALAND

Vs ASSAM

27-02-2021: NAGALAND

Vs MANIPUR

01-03-2021: NAGALAND Vs

ARUNACHAL PRADESH

Tekalen agüja aliba asaya ajak Chennai nung asayatsü.

9buba H.L Singson Memorial Football asayamung tenzükogo

Peren, Tsüklai/February 11, 2021 (TYO):

Mongolbarnü (10.02.2021) Peren District kübok Public Ground, Ahthibung Town nung 9buba H.L Singson Memorial Football Tournament 2021 tenzükogo. Iba asayamung lapokba sentong nung Commissioner & Secretary, YR&S, Alun Hangsing, NCS alakteta tejaoker ama aruagi aden. Hangsing den külemi YR&S

dept. indang ketdangsürtem aser SDO(C) Ahthibung, Alemyapang nung aruagi denogo.

Hopta piyong ayongtsü aliba asayamung ya Recreation Club Ahthibung (RCA) ajanga ayongzüker.

Asayamung lapoka, NMT Ahthibung aser KYSU Medziphema na asaya, kong NMT-i goal 2-0 agi KYSU akok.

Nagaland Legislative Assembly nung asür Lalkhosei Singson'er jabaso Lt. H.L Singson ya kümsük asem atema atonga 6th Tenning A/c nungi representative ka ama shima liasü. H.L Singson ya Minister of state for Forest ka liasü. Recreation Club, Ahthibung ya Lt. H.L Singson ajanga tenzüksüba tentet ka lir aser pa nüngtem nung indoor stadium ka lapoka lir.

58buba Tizu Area Sports Association Meet tenzükogo



Phek, Tsüklai/February 11, 2021: Bodhbarnü, Kutsapo yimdak 58buba Tizu Area Sports Association Meet lapokba sentong nung Kuzholuzo (Azo) Nienu, MLA-i jembiba yangi angur.

Phek, Tsüklai/February 11, 2021 (TYO): Bodhbarnü,

Kutsapo Village Local Ground nung "Friendship Forever" omen kübok 58buba Tizu Area Sports Association Meet tenzükogo. Iba Meet lapokba sentong nung Kuzholuzo (Azo) Nienu, MLA 19th A/c Phek tongti tesemdang ama aruagi

denogo, ta sangdong ka ajanga metetdaksü.

Iba sentong nung Azo-i asayartem dang pei dak aketba sempet tajungtiba amshia shilem agitsü aser lenla ajunga nung meranga inyaksü ajungshi.

58buba Tizu Area Sports Association Meet lapokba

sentong nung Mudotso Nuwiry, G/S TASA menden liasü. Village Council Kutsapo, Chairman, Zashevezo Rhakho-i telok pela agizük aser Kutsapo yimtsüing nungi Tetsü telok kati sobaliba ken ka aten. Kuzhoduyi Rhakho-i o jembiba aser V/P TASA, Vei Veswu-i oath ceremony ketdangsüa agiogo.

FA Cup: Manchester City quarter-finals-i iogo

Swansea, Tsüklai/February 11, 2021 (Agencies):

Manchester City-i maneni shilem tajung agia, Bodhbarnü par teloki Swansea madak goal 3-1 agi takok ngua FA Cup quarter-finals-i iogo. Man City-i tan asayamung kokra parnoki season ka nung asayamung pezüben takok angur alitsü.

Tesemdang team - Manchester City atema Kyle Walker, Raheem Sterling aser Gabriel Jesus nungeri goal ka ka idaksü. Man. City-i tetoktepba ajak nung takok ngua arudar.

Premier League nung Pep Guardiola'er telok Manchester City asaya ka den point pungo agi temaba jenjang tongteta lir, parnoki April ita League Cup final nung Tottenham den asayatsü aser tan ita tatemlen Champions League last 16 nung Borussia Monchengladbach den asayatsü.

Schedule nung tetsükdaksü jenti adok yongjia, south Wales nung assyiatema Guardiola-i asayar tajung talisa Sterling, Rodrigo, Bernardo Silva aser Ilkay Gundogan nung shima liasü. Deobarnü, Premier League asaya nung Manchester City-i goal 4-1 agi Liverpool kokogo. Iba League nung Walker melen Joao Cancelo asayaogo.

FA Cup nung, England defender Walker-i minute 30buba nung City atema mezüing goal idaksü. Tanabuba half nung City-i kanga dang kara asaya azüokteta amokbangadok.

Ibaji masüdag, Rodrigo teyari ajanga Sterling-i telok atema goal tanabuba bendenloktsü. Tan season nung Sterling-i goal 11buba idaksür alitsü.

Tatsüka dang lir, Silva kolak agi tongoktsüba ball ka Jesus-i agizüka goal tasembuba inoktsü. Ibaji ajanga, Honibarnü, Etihad nung Tottenham den ano tajungba asayatsü mechi, Guardiola-i Sterling, Silva aser Gundogan nung anisüngzükdakja tanüingba asaya atema asayar melen liasü.

Ajisüaka, asaya atemtsü minute 20 anünga lia, Rodrigo tenüklang teloktep yiruba ajanga asaya nungi pa tukutsüsa aküm aser pa yiruba ya Guardiola atema tebilemstü tuluka lir.

Manchester City pur goal 3-0 agi tejakdang ser asayaba mapang, Morgan Whittaker-i minute 77buba nung Swans atema goal ka idaksü, saka top flight tongtetsü atema Steve Cooper'er teloki tali bendanga agüja asayatsü nüngdaker.

Mokokchung nung BBBP Badminton asayamung tenzükogo



Mokokchung, Tsüklai/February 11, 2021: Mokokchung nung "Beti Bachao Beti Padhao Beti Khelao' Badminton asayamung lapokba mapang SDO (C), Mokokchung Dharam Raj, IAS-i jembiba yangi angur.

Mokokchung, Tsüklai/February 11, 2021 (TYO):

Brehostibarnü, Mokokchung nung tetsürtem atema "Beti Bachao Beti Padhao Beti Khelao' Badminton tournament tenzüksüogo.

District Administration & DLCW-MSK (BBBP) Mokokchung District aser Mokokchung District Badminton Association longjemer iba asayamung ayongzüker.

Iba asayamung ya February 11 aser 12, 2021 nü Indoor Badminton Stadium, Mokokchung nung arishi küm 11 aser küm 15 tekübok den Open category lemsar asayatsü.

"Beti Bachao Beti Padhao Beti Khelao' Badminton asayamung lapokba sentong nung Dharam Raj, IAS, SDO (C), Mokokchung alakteta tejaoker ama aruagi aden aser linük nung tetsür tanurtem renlokdahtsütsü atema pai BBBP indang tongtibangtem, mapatong aser sentong balala indang telok den jembiba. Pai tetsür tanur ajak dak saisapong tsütsü jangrabangra shilem agitsü asoshi ayongzüker. Kasa sentong nung Kathyinla Jamir, EAC (P) Mokokchung-i telok pela agizük, ta sangdong ka ajanga metetdaksü.

BILEMDANGANG

"Teyazü kulibo aika alir, saka ochi kulibo ka dang alir."